

Gobierno a uni cu parlamento y gobernador pa honra den feliz memoria e gran estadista

ORANJESTAD - Diasabra ultimo pa di 22 añ con-secutivo Gobierno di Aruba a rindi homenahe na e bida, legendario y memoria di Gilberto François “Betico” Croes riba su fecha natal. E acto protocolar y ofrenda floral a tuma luga riba Plaza Libertador Betico Croes den presencia di su excelencia gobernador Fredis Refunjol, president y miembronan di parlamento, prome minister Mike Eman y miembronan di su gabinete, pero principalmente miembronan di famia di Betico mes. Minister di Cultura Otmar Oduber a hiba palabra recordando Betico Croes como e persona humilde, trankil y di pueblo cu e tabata Oduber a haci esaki pa medio di repasa e Betico su participacion activo den comunidad, riba tereno deportivo y cultural, ademas di su carera profesional y den politica. Yiu muhe mas chikito di Betico, Sra. Glendeline Croes a papia den nomber di e famia di un manera visibel emocional. Den su palabranan el a pidi tur presente y pueblo henter pa recorda su defunto tata. “No solamente pa loke el a haci den pasado, pero mas importante loke e lo representa pa nos pais den futuro pa e futuro generacionnan”. E ta spera cu e his-



toria di Aruba por sirbi Arubianonan como inspiracion ora e yamada yega na nan pa defende e interesnan di nos isla. Di su banda, Minister President Mike Eman a repasa e puntonan anterior entre otro, incluyendo cu e virtud, acto y lesnan cu Betico a

laga atras mester sirbi nos tur como ehempel. “E forma con el a surpasa retonan y a sacrifica su mes y su famia pa logra cosnan grandi pa e isla chikito aki ta sirbi nos como guia”. Nos prome mandatario a tuma oportunidad aki pa invita pueblo di Aruba pa

uni no solamente den e celebracion di Betico su dia, pero tambe den su ideologia riba tur otro dia. Premier Eman a bisa: “Ban brasa e momentonan aki manera un solo pais y un solo pueblo y asina tambe duna merito na su lucha y su sacrificio”. Despues di e

parti protocolar, a sigui manifestacion cultural caminda Premier Eman a comparti cu e publico cu a reuni riba plaza pa disfruta di e presentacionnan di baile y musica, como tambe di e diferente tent ofreciendo product y pasabocanan crioyo. □